



**UNIT KOMUNIKASI KORPORAT
JABATAN PERTANIAN MALAYSIA**
(*Department of Agriculture Malaysia*)
WISMA TANI
ARAS 17, NO. 30 PERSIARAN PERDANA
PRESINT 4, 62624 PUTRAJAYA



Tel : 603-8870 3102/ 3045
Faks : 603-8870 3044
Portal : www.doa.gov.my
E-mel : pro@doa.gov.my

SIARAN MEDIA

PROGRAM JELAJAH DIALOG INDUSTRI AGROMAKANAN 2022 DAERAH SEGAMAT JOHOR

SEGAMAT, 6 MAC 2022 – Program Jelajah Dialog Industri Makanan 2022 (DIA2022) pada kali ini telah dianjurkan oleh Kementerian Pertanian dan Industri Makanan (MAFI) melalui Jabatan Pertanian Malaysia di daerah Segamat, Johor. Program ini bertujuan untuk mendapatkan input, idea, pandangan dan cadangan daripada pemain subsektor tanaman melalui sesi libat urus secara langsung bersama pihak pengurusan tertinggi MAFI diketuai oleh YB Menteri Pertanian dan Industri Makanan, Datuk Seri Dr. Ronald Kiandee.

Turut sama pada program hari ini sebagai panel dialog adalah YBhg. Datuk Badrul Hisham bin Mohd, Timbalan Ketua Setiausaha (Pembangunan) MAFI dan YBhg. Dato' Zahimi bin Hassan, Ketua Pengarah Jabatan Pertanian Malaysia.

Dalam program ini juga, YB Menteri MAFI telah menyampaikan Sijil Amalan Pertanian Baik Malaysia (myGAP) bag subsektor tanaman kepada 18 orang usahawan tani Daerah Segamat dan lesen peralatan menangkap ikan kepada 10 orang nelayan darat. Turut disampaikan sumbangan MAFI Prihatin berupa bakul makanan dan sumbangan daripada pihak industri bernilai RM52,500 kepada 150 orang mangsa yang terjejas akibat banjir di Daerah Segamat.

Jelajah DIA2022 merupakan program secara bersasar yang telah dirancang oleh Kementerian Pertanian dan Industri Makanan (MAFI) dengan tema 'Pemodenan dan Produktiviti Menjamin Sekuriti Makanan' ekoran kepada kejayaan Program Dialog Industri Agromakanan bertitik tolak pada 10 Februari 2022 di Dewan Serbaguna MAFI. Program ini melibatkan terus pemain industri dalam sektor agromakanan meliputi subsektor padi, tanaman, ternakan, perikanan dan keseluruhan rantai agromakanan termasuk kementerian, jabatan dan agensi lain yang berkepentingan dalam sektor agromakanan.

Dialog ini diadakan bagi mendapatkan pandangan dan cadangan dalam memacu hala tuju sektor agromakanan khususnya berkaitan sekuriti makanan supaya seiring dengan keperluan semasa kearah pemodenan sektor pertanian dan jaminan bekalan makanan negara di bawah Dasar Agromakanan Negara 2021-2030 (DAN 2.0).

Dr Ronald berkata sesi dialog sebegini diadakan secara bersiri dan berterusan di peringkat negeri-negeri untuk terus memperkukuhkan agenda Sekuriti Makanan Negara menerusi idea, pandangan dan cadangan para pemain industri dalam memacu hala tuju sektor agromakanan khususnya berkaitan sekuriti makanan supaya seiring dengan keperluan semasa.

“Cadangan dan input daripada pemain industri diperhalusi dalam menambah baik dasar dan pelan tindakan seiring dengan peranan Kementerian ini untuk mentransformasikan sektor pertanian ke arah yang lebih moden, dinamik dan berdaya saing sekaligus mempertingkatkan kualiti penyampaian perkhidmatan kepada golongan sasaran,” jelas beliau.

Tambah Dr Ronald, MAFI sentiasa prihatin akan keperluan golongan sasaran dan terus mengambil inisiatif melaksanakan sesi dialog sebegini untuk merasai denyut nadi pemain industri supaya apa sahaja dasar, program dan intervensi yang dirangka oleh Kementerian adalah bersifat holistik dalam dalam memperkasa sektor agromakanan negara sekaligus memberi manfaat limpahan ekonomi pertanian kepada golongan sasaran secara umumnya.

Dr Ronald berkata, Johor merupakan negeri pengeluar utama bagi buah-buahan dan sayur-sayuran yang bukan sahaja untuk kegunaan domestik, malahan turut dieksport ke Singapura.

“Selaras dengan halatuju pertanian negeri ini yang ingin menjadikan Johor sebagai *Food Basket Malaysia* dan membangunkan industri agromakanan yang kompetitif, MAFI akan sentiasa menyokong dan membantu industri agromakanan di negeri ini untuk kekal mampan dan berdaya saing,” katanya lagi.

Dalam hal ini, Jabatan Pertanian Malaysia juga telah menyalurkan RM6,054,000 untuk Negeri Johor melaksanakan beberapa program antaranya Pembangunan Tanaman Buah-Buahan Jangka Panjang, Pembangunan Tanaman Buah-Buahan Jangka Pendek, Pembangunan Tanaman Sayuran, Pembangunan Pertanian Komuniti, Pembangunan Industri Tanaman Kelapa, Naiktaraf Agrofood Park (AFP), Pembangunan Agrofood Park (AFP) yang baharu, Projek Peningkatan Pendapatan Pesawah Luar Jelapang (B40), Projek Pembangunan Industri Cendawan, Pembangunan Industri Kopi, Pembangunan Tanaman Makanan Ternakan serta Naiktaraf Kompleks Pengembangan Agro-Tekno Negara.

MAFI juga memperuntukkan beberapa insentif di bawah Projek Pembangunan Persekutuan melalui Jabatan dan Agensi di bawahnya bagi Daerah Segamat, Johor. Antaranya Pejabat Pertanian Daerah Segamat telah diperuntukkan insentif berjumlah RM456,178 melibatkan 168 orang penerima meliputi 6 projek. Selain itu, seorang usahawan FAMA Daerah Segamat juga menerima Insentif Agrobazaar Kedai Rakyat (AKR) bernilai RM20,000.

###

**Disediakan oleh;
Jabatan Pertanian Malaysia
Kementerian Pertanian dan Industri Makanan (MAFI)**